

Inuiattut erinarsuutitsinni marluusuni sorleq pisortatigoortumik atorneqassanersoq nutaamilluunniit taarserneqartariaqarnersoq pillugu apeqquteqaat aallaavingalugu oqallinnissamik siunnersuut.

(Inatsisartunut ilaasortaq, Aqqalu C Jerimiassen, Atassut)

Akissuteqaat

(Meeqqanut, Inuusuttunut, Ilaqutariinnut, Nunamut Namminermut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Aqqalu C. Jerimiassen, Atassut, inuiattut erinarsuutigit pillugit, kiisalu erinarsuutip sorliup nunatsinnut pisortatigoortumik ilisarnaataasup ersarissumik nassuiarneqarnissaanut pisariaqartitsineq pillugu oqallisissiasamik siunnersuuteqarneranut Naalakkersuisut qutsavigaat. Kalaallisut inuiattut erinarsuuteqarnissarput pillugu apeqqut Inatsisartut ataatsimiinneranni arlaleriarlugu oqallisigineqartarpoq; 1979, 1990, 1992, 1994, 2000, 2002, 2003 2017-imi aamma massakut 2025-mi ukiakkut ataatsimiinnermi.

Inuiattut erinarsuutivut imatut taaguuteqartut tassaapput: "Nunarput utoqqarsuanngoravit" Henrik Lundip taalliaa Jonathan Petersenillu erinniaa aamma "Nuna asiilasooq" Jonathan Petersenip taalliaralugulu erinniaa. Siullertut taaneqartoq 1916-imi inuiattut erinarsuutitut atorneqalerpoq, kingullerlu 1979-imi. Siullermik "Nunarput utoqqarsuanngoravit" Sverigemiut inuiattut erinarsuutaannik "Du gamla, du fria, du fjällhöga Nord"-imik erinaqaaqaarsimavoq. Jonathan Petersenip kingorna erinnerpaa.

Eqqortuuvuq "Nunarput utoqqarsuanngoravit" aamma "Nuna asiilasooq" inuiattut erinarsuutitut atorneqartarneri, kiisalu aalajangerneqarnikuunani erinarsuut sorleq pisortatigoortumik atuutissanersoq. Erinarsuutitut taakkununga marluusunut tunngatillugu ileqqoriinnagassatut ittumik isumaqartoqalersimavoq, taamaalineranilu erinarsuutit taakku marluullutik inuiattut erinarsuutitut isigineqalersimallutik. Taamaattorli inuiaqatigiinnut paatsuunganarsinnaavoq pisortatigit inuiattut erinarsuutit marluk akuerisaallutik atorneqartarmata. Taamatut marloqiusamik inissisimanerup erinarsuut sorleq pisortatigoortuunersoq pisortatigit aqqissuussinermi, inuiattut ullorsiornermi imaluunniit nunat tamalaat akornanni aallartitani nalornissutaasarluni. Inuiattut erinarsuut aamma meeqqanit siusissumik alanngaarlugu ilinniarneqartariaqarpoq, ataatsimoornermut inuiattullu kinaassutsimut ilisarnaataammat pingaarutilik.

Siunnersuuteqartumit iserfigineqarpoq nunami maani oqaatsit atorneqartut aammalu kalaallit oqaasiini sumiorpaluutit pingaarnerit ilaatigut inuiattut erinarsuummi ilaatinneqarsinnaasut. Erinarsuummut siunnersuut, nunatsinni oqaatsit atorneqartut aammalu kalaallit oqaasiisa sumiorpaluutaannik pingaarnernit ilaatillugit siunnersuutigineqartoq, isumassarsiornarpoq akuutitsinermik ataatsimoornermillu kissaateqarnermik takutitsisuulluni.

Allannguisoqassappat Naalakkersuisut isumaqarput sukumiisumik paasisitsiniaasoqartariaqartoq, peqatigiiffinnik susassaqtartunik oqaloqatigiittoqarluni kiisalu innuttaasunik peqataatitsilluni. Inuiattut erinarsuummik aalajangiinermi ileqqunik atuinermillu aallaaveqartariaqarpoq innuttaasunillu amerlanernik isumaqatigineqarluni, misigissutsinut tunngasupilussuummat kinaassutsimullu aalajangiinermut tunngalluni.

Aaqqiissut tassaasinnaavoq innuttaasut erinarsuutit taakku marluk pioreersut pillugit innuttaasutut taasitinneqarnerisigut – imaluunniit erinarsuummik nutaarluinnarmik inuiattut ataatsimut erinarsuummik tikkuussisoqarluni. Taamatut suleriaaseqarnikkut tamat oqartussaaqataanerannik tunngaviusumik qulakkeerinnittuusaaq, innuttaasullu maani nunami kinaassutsimut paasinnittarnerannut inuiattullu ineriartornissamut takussutissiaassalluni pingaarutilik.

Taamatut Naalakkersuisut oqaaseqarlutik Inatsisartuni oqallittoqarluarnissaa kissaatigaat.